

NAQQIUT

Allaffisornikkut naqqissuteqaat akissuteqaammut ullormi 20. april 2012-imeersumut.

Kalaallit Nunatsinni efterskolimik suli ataatsimik, Tasiilami inissinneqartussamik, UKA 2013-mut pilersitsinissaq pillugu Naalakkersuisut siunnersuusiornissamik peqquneqarnissaannik Inatsisartut aalajangiiffigisassaattut siunnersuut. (Inatsisartunut ilaasortaq Harald Bianco, Inuit Ataqtigiit)
(Inatsisartunut ilaasortaq Harald Bianco, Inuit Ataqtigiit)

Akissuteqaat

(Ilinniartitaanermut, Ilisimatusarnermut Nunanilu Avannarlerni Suleqatigiinnermut Naalakkersuisoq)

Siullermeerinnineq

Kalaallit Nunatsinni efterskolimik suli ataatsimik, Tasiilami inissinneqartussamik, UKA 2013-imut pilersitsinissaq pillugu Naalakkersuisut siunnersuusiornissamik peqquneqarnissaannik siunnersuutit pillugu Naalakkersuisut qutsavigaatsit.

Nunatsinni utaqqiisaasumik efterskolini piujuartunilu misilittagaalersut pitsaasuupput. Efterskolit pillugit aqqissusseqqinneq inuusuttortarpassuatsinnut pitsaasuusutut naleqquttuusutullu isikkoqarpoq. Inuusuttut efterskolimiikkaangamik ilinniartitsissutinit pissarsiinneq ajorput aammali aamma annertuumik inuttut ineriartortarlutik inunnillu attaveqartarnermi peroriartortarlutik. Taamaammat aalajangiiffigisassatut siunnersuutit naleqquttut Naalakkersuisut isigaat, tassungali peqatigitillugu isumaqarlutik siunnersuut inaarutaasumik isummerfigitinnagu tunngavissat ilaat siullermik paasiniaqqaartariaqartut.

Ilisimaneqartut Inatsisartut 2012-imi Upernaakkut Ataatsimiinngitsiarneranni skolehjemmit pillugit nassuiaat Naalakkersuisut suliaaraat. Skolehjemmit pillugit nassuiaammi ilaatigut inassuteqaatigineqarpoq kommunit skolehjemmimiinnissamik neqeroorutaannut ilassutitut allatullu periarfissatut siunissami efterskolinik imaluunniit atuarfinnik ineqarfiutigisunik pilersitsinissaq isumaliutigineqartariaqartoq. Skolehjemmit pillugit nassuiaammi aamma oqaatigineqarpoq skolehjemmini annertuumik iluarsaassineq 230 mio.kr.-it tikillugit aningaasaliinissamik pisariaqartitsiviusoq.

Aammattaq ilinniartitsinermit periusissiaq ataatsimiinnermi uani kingusinnerusukkat Naalakkersuisut saqqummiutissavaat, tassanilu oqaatigineqarpoq sinneruttoqartarnissaa pinaveersimatinniarlugu meeqqat atuarfianni atuartut efterskolimi aallartissinnaasariaqartut.

Siunnersuuteqartup eqqortumik oqaatigaa efterskolernissamik neqeroorutit qinnuteqartut tamaasa efterskolersinnaatinnissaannut naammanngilluinnartut, nassuerutigisariaqarparpulli skolhjemmit tamaasa iluarsaannissaannut efterskolimillu pilersinissamat pilersitsinermit aningaasartuutit kisiisa eqqarsaatigalugit 100 mio.kr.-it tikillugit akeqartussamat nunarput akissaqanngitsoq.

Suliniutinik tulleriinnilersuinissaq pisariaqartinneqarpoq. Taamaammat skolehjemmit sumiittut iluarsanneqarsinnaanerini taakkulu sumi assersuutigalugu efterskolini atuarfinnillu ineqarfiutigisunik taarsinneqarsinnaanerannik aalajangiitinnata kommunini atuarfeqarneq siunissami qanoq aqqissuussaassanersoq aalajangeqqaartariaqarparput. Allatut oqaatigalugu, Naalackersuisut isumaqarput sumi efterskolini nutaanik pilersitsisinnaanerup naleqqunnerpaajunerani aalajangiitinnata skolehjemminik iluarsaassinissamut efterskolinillu sanaartornissamut imminut atasumik pilersaarasioqqaartariaqarpugut.

Taamaammat Inatsisartut, kommunit nunaqarfimmilu innuttaasut skolehjemmit pillugit nassuiaami inassuteqaatigineqartut kisiisa pinnagit oqaloqatigeqqinnissaannut ilinniartitsinermut periusissiaq pillugu oqallinnermi Inatsisartut inassuteqaatissaat aamma utaqqimaartariaqarpagut.

Taamaammat siunnersuutip maanna itigartinneqarnissaa Naalackersuisut inassuteqaatigaat, tassungali peqatigitillugu siunnersuutip Naalackersuisut Ilinniartitaanermut periusissiaat pillugu oqallinnissamut ilaatinneqarnissaa siunnersuutigalugu.